

Skirbi pa Ruthy "Lady Ruth" Vrieswijk-Bergen

Sabiduria den nos alegria

LADY Ruth a atende dos actividad den fin di siman tra'i lomba. Nos no por a atende tur pa motibo di su situacion cu su sinus. Nos sa cu nos salud ta bisa: "Vatbaar voor verkouden" y cu nos no por sali mucho den ora di anochi y of den serena ora e sinus ta un krench'i pisa.

Como adulto mayor nos tin cu cuida nos salud. Pero, nos a atende e 2 actividadnan den dia riba diasabra dia 8 di maart, Dia Internacional di hende muhe. Den ora di mainta nos a bishita Educampus Building cu ta e ex-edificio di Bon Bini Bazar den caya grandi riba invitacion di e simpatico hende muhe profesional cu un curason di oro "Magaly Maduro", e dinamico presidente di e grupo Soroptimist na Aruba y nos a gosa di un bunita programa cu variacion den arte, actuacion, poema, charla y diferente stand.

E oradornan tabata fantastico, inspira tur hende rond di nan cu nan storia di logro den bida cu su ups and downs. Nos flamante Miss Universo Aruba, Anouk Eman a duna un short video presentation di su historia fo'i mucha den su sport di landamento sincronisa y con el a lanta bek fo'i su operacion di lomba yega na su participacion den e eleccion di Miss Universo. Su amor y pasion pa sincronized swimming cu a cambia pa prepara su mes p'e certamen di Miss Universo.

Natusha Croes un tremendo art teacher su alumnonan den actuacion a presenta un obra teatral mahestral cu hopi emocion cu ta biba den nos tur como hende muhe. Cu e toke den diferente lenga, pero comprendibel pa tur presente. Den ora di tra'i merdia, Lady Ruth a bay Hilton Hotel pa atende e di 8 of ta di 7 conferencia di hende muhe organisa pa gobierno su prome Prome Minister Evelyn Wever-Croes cu ayudo profesional di un di e man drechinan cu ta Sandra Suarez-Croes, cu a luci masha masha bunita mes den su bisti blanco di angel.

Esaki tambe tabata hopi impactante cu e orador y panelistanan expresando nan retonan como hende muhe y con nan a surpasa esakinan. Lamentablemente nos no a keda te mucho laat den oranan di atardi y no a scucha e charla di Minister di Cultura Xiomara Maduro. Nos a scucha si e charla na cuminsamento di e atardi aki di Minister Presidente Evelyn Wever-Croes cu a comparti di su bunita curason con e ta fungi como un multifacetico den famia y trabao combina y menciona e cuater areanan cu ta tene den balans cu ayudo di un tremendo network. Nos a presencia y scucha tambe e presentacion di 3 miembro di nos Parlamento Hubenil cu tambe tabata hopi bon. Ta chispanan di 2 di e actividadnan cu Lady Ruth a atende.

Nos no por a atende e actividad e biaha aki di Centro di Barrio Playa Pabao diabierna anochi dia 7 di maart, cu tabatin nos ombudsman como orador principal invita, sra Jurima Bryson, cu e tema Derecho y



trato igual p'e hende muhe.

Coleganan Poeta Omaira y Lady Ari a recita varios di nan bunita poemanan y a toca e curasonnan presente cu nan bunita inspiracion. Lady Ruth a manda un grabacion cu poema, ya cu ta varios aña e tambe ta forma parti di e team di artista y poeta cu ta duna nan bunita presentacion den CBPP. Nos a prefera di no sali den ora di serena di anochi ainda, pa laga e situacion di sinus calma. Leuk pa topa asina hopi hende n'e actividadnan prestigioso, organisa anualmente dia 8 di Maart. Nos a scoge tambe pa no bay Cede di MEP den oranan di diasabra 8 di maart anochi, p'e mesun motibo menciona di sinus.

Prome cu e fecha di 7 y 8 di maart, Lady Ruth a topa cu algun bon amigo lider scout na Ad Patres mas of menos dos of tres siman prome, ora a bay e entierro di e kerido tata di un di nos lidernan. Despues ta fayece tambe un di e miho Akelanan di Aruba den tempo di su tempo, esta sra. Glenda Diana Bareño di e barrio di Piedra Plat, pero cu a fungi como lider scout den grupo Santanero na Dakota unda el a biba pa hopi aña. Pues, atrobe tristesa man den man cu alegria. Asina bida ta sigui lora y ta nos tur lo hayta un beurt un dia, sin sa con, e dia, e ora y of e luga.

Mientrastanto ta bon pa nos tur sigui cuida nos salud pa rek nos tempo aki na mundo y pa nos gosa mas tanto cu ta posibel den cosnan alegre cu ta uni famia. Ban prepara nos curason pa nos Dia Nacional, nos Dia di himno y bandera cu ta ey mes na lorada di skina. Ah si! Prome cu esey, e competencianan den Poeta di Patria cu lo tuma luga atrobe den Fort Zoutman. Ban wak si nos salud ta permiti nos bay den aire liber, asina mes cu tin tanto luga mas gezellig y acustiek, no ta comprende dicon Fort Zoutman. Enfin, tur cos ta pasa pa un motibo. Laga bo motibo ta gradicimento y amor pa bo Creador di amor. Dios mediante nos lo topa sea den relato of den persona. Pasa un dushi dia yen di sabiduria den nos alegria!